



S Í N T E Z E

LORON 120 KOMPROMISUS NIAN IX GOVERNUN KONSTITUSIONÁL

loron 1 fulan-jullu to'o loron 28 fulan-outubru tinan 2023
"Mai ita salva Estadu Direitu Demokrátiku"

1 *Hatuur filafali normalidade demokrátika liuhusi Parlamentu lejítimu no Governu legál, atu aprova Programa Governu ba tinan 5 nian, aprova Orsamentu Retifikativu ba tinan 2023 no atu aprova Orsamentu Jerál Estadu ba tinan 2024 nian. Halo mós esforsu sira hotu hodi revoga (hasai) lejislasaun no regulamenta-saun sira-hotu ne'ebé presiza atu konsolida Estadu ne'e.* Iha loron 12 fulan-jullu tinan 2023, Konsellu Ministrus aprova Programa Governu Konstitusionál IX nian, hodi define política pública prinsipál sira ne'ebé sei adota durante mandatu. Iha loron 9 fulan-agostu tinan 2023, Konsellu Ministrus aprova Orsamentu Jerál Estadu Retifikativu ba tinan 2023 nian. Orsamentu Retifikativu ba tinan 2023 ho valór dolar amerikanu billaun 1,77, ne'ebé hetan aprovasaun husi Parlamentu Nasionál iha loron 24 fulan-agostu tinan 2023, iha votasaun finál globál. Iha loron 24 fulan-jullu tinan 2023, Konsellu Ministrus aprova, orgánika foun Governu nian, Dekretu-Lei n. 46/2023 loron 28 fulan-jullu. Iha loron 2 fulan-outubru tinan 2023, Konsellu Ministrus aprova montante total despeza asociada nian ba kada título orsamentál kona-ba Orsamentu Jerál Estadu ba tinan 2024 ho valór globál previstu ho dolar amerikanu billaun 1,6. Montante ida-ne'e hatudu redusaun ida husi 18% kompara ho OJE 2023.

2 *Revoga Lei n. 3/2014, ne'ebé kria RAEOA no ZEEMS, atu nune'e Autoridade RAEOA sira hetan kontrolu ne'ebé di'ak husi Governu Sentrá, tanba objetivu harii ZEEMS ne'ebé deskreve iha Lei ba kria-saun ZEEMS seidaun atinje, mezmú depoizide tinan sia ne'ebé naruk, no halo auditoria imediata ba atividade sira-hotu, ne'ebé inklui prosesu akizisaun "Ró Haksolok" ne'ebé ho folin boot.* Iha loron 25 fulan-setembru, Konsellu Ministrus aprova projetu Proposta Lei ne'ebé aprova alterasaun datoluk ba Lei n.3/2014, loron 18 fulan-juñu, ne'ebé kria Rejiaun Administrativa Espesial Oe-Kusi Ambenu (RAEOA) no Estabelese Zona Espesial Ekonomia Sosial Merkadu Oe-Kusi Ambenu no Ataúru. Proposta lei ida-ne'e hetan aprovasaun jeneralidade iha Parlamentu Nasionál, iha loron 24 fulan-outubru tinan 2023. Alterasaun sira ne'ebé aprova ona inklui: estabelesimentu kadru jurídiku ida-ne'ebé adekua ba Zona Espesial Ekonomia Sosial no Merkadu iha territóriu laran tomak; podér tutela ba RAEOA sei ezerse de'it husi Primeiru-Ministru; podér regulamentár RAEOA nian sei iha konformidade ho Konstituisaun no Lei; kontratu sira ne'ebé RAEOA selebra ona hodi Zona Espesial Ekonomia Sosial Merkadu Oe-Kusi Ambenu no Ataúru nia naran sei transfere automatikamente ba RAEOA. Kona-ba prosesu akizisaun "Ro-Haksolok", Governu halo hela ezame detalladu ida kona-ba dokumentu hotu-hotu ne'ebé sai parte hosi prosesu ne'e, inklui kontratu oioin ne'ebé asociadu ho konstrusaun ró nian, nomos analiza viabilidade téknika no finansiera karik kontinua ho projetu ne'e.

3 *Anula Lei ne'ebé kria munisípiu Ataúru, tanba laiha kondisaun infraestruturá no lojístika iha illa Ataúru, hanesan estrada, eletrisidade, bee, portu no aeroportu.* Konsellu Ministrus aprova ona proposta Lei kona-ba alterasaun dahaat ba Lei n. 11/2009, loron 7 fulan-outubru, ne'ebé aprova Divizaun Administrativa Territóriu. Lei ida-ne'e hetan ona aprovasaun ho jeneralidade iha Parlamentu Nasionál, iha loron 24 fulan-outubru tinan 2023. Alterasaun ne'e ninia objetivu mak atu halakon munisípiu Ataúru no kria divizaun administrativa foun ida ho eskalaun dahuluk ne'ebé hanaran "Ataúru," hanesan define ona iha Artigu da-5 hosi Konstituisaun Repúblika.

4 *Halo Auditoria ba Tribunal Kontas, Komisaun Antikorrupsaun no ba Ministériu Públiku kona-ba implementasaun programas no falta prosesu aprovizionaun ba projetu barak.* Governu halo hela análise legál kona-ba falta prestasaun konta ne'ebé hetan auditoria husi Tribunal Kontas, Komisaun Anti-Korrupsaun no Ministériu Públiku.

5 *Halo Auditoria ba Komisaun Funsau Públika no Inspesaun Jerál Estadu nian kona-ba rekrutamentu ilegal no fin hosi kontratu sira, sein justifikasaun.* Tantu kona-ba Komisaun Funsau Públika, nomos Inspesaun Jerál Estadu nian, prepara ona termu referénsia sira ne'ebé presiza atu halo auditoria ba entidade rua ne'e.

6 *Halo Auditoria ba fraude eleitorál, ne'ebé komete husi Administrasaun Eleitorál, iha Eleisaun Parlamentár foin daudauk ne'e, hodi salvaguarda Estadu Direitu Demokrátiku.* Halo ona prosesu avaliasaun ida ba organiza-saun no funsionamentu Sekretariadu Tékniku Administrasaun Eleitorál (STAE) no ba atividade sira ne'ebé Sekretariadu Tékniku Administrasaun Eleitorál (STAE) halo ona iha prosesu eleitorál ikus ne'e, hodi identifika nesiedade atu halo prosesu resenseamentu eleitorál foun ida, hodi atualiza ho loloos, informa-saun ne'ebé hatuur iha Baze Dadus Resenseamentu Eleitorál nian.

7 *Reestruturá Diresaun TIMOR GAP no ANPM, hodi garante maiór efisiénsia iha setór petróleu, ne'ebé krusial ba dezvoltamentu país nian.* Konsellu Ministrus aprova ona alterasaun daruak kona-ba Dekretu-Lei n. 31/2011, loron 27 fulan-jullu, TIMOR GAP - Timor Gás & Petróleu, E.P. nomeia ona Rui Maria Alves Soares, hanesan Prezidente Konsellu Administrasaun no, tanba ne'e, mós Prezidente Komisaun Ezekutiva TIMOR GAP, E.P. - Timor Gás & Petróleu, E.P. (TIMOR GAP), ba mandatu tinan haat. Konsellu Ministrus aprova ona mós alterasaun datoluk kona-ba Dekretu-Lei n. 20/2008, loron 19 fulan-juñu, ne'ebé kria Autoridade Nacional Petróleu. Nomeia ona Gualdino do Carmo da Silva, hanesan Prezidente Konsellu Diretivu Autoridade Nasionál Petróleu, I.P. (ANP), ba mandatu tinan haat. Aprova ona mós kria-saun ba Autoridade Nasionál Minerais I.P. (Dekretu-Lei n. 63/2023, loron 6 fulan-setembru), no nomeia Rafael Danilson Magno de Araújo, hanesan Prezidente Konsellu Diretivu. Kria mós Institutu Jeosiénsias Timor-Leste I.P. (Dekretu-Lei n. 60/2023, loron 6 fulan-setembru), hili Job Brites do Santos hanesan Prezidente Konsellu Diretivu foun ba Institutu Jeosiénsias Timor-Leste nian. Halakon mós Kompañia Mineira Timor-Leste, S.A. no kria Murak Raik Timor, E.P. (Dekretu-Lei n. 64/2023, loron 6 fulan-setembru), hanesan Prezidente Komisaun Ezekutiva no Prezidente Konsellu Administrasaun nian maka José Manuel Gonçalves.

8 *Reestruturá Polisia Sientífica Investigasaun Kriminál (PSIK) tanba falta integridade no profesionalizmu.* Elabora ona relatóriu no proposta reforma estrutural PSIK nian. Dekretu-Lei kona-ba Estatutu Pesoál PSIK no Dekretu-Lei kona-ba Alterasaun ba Estatutu PSIK nian iha hela faze preparasaun.

9 *Konsolida pás no seguransa, ne'ebé nesária ba dezvoltamentu nasional, hodi garante direitu, liberdade no garantia fundamental ba sidadaun sira hotu.* Iha loron 120 dahuluk mandatu dahuluk husi Governu Konstitusionál IX hahú ho inisiativa oioin no reformas hodi konsolida pás, estabilidade no seguransa iha país ne'e, ne'ebé nu'udar kondisaun fundamental ba dezvoltamentu nasional.

10 *Revee kedas prosesu ilegal ba apozentasaun forsa-da husi dezenas elementus PNTL nian.* Konsellu Ministrus aprova ona, liuhosi Rezolusaun Governu nian, ba reintegrasaun polisia PNTL hamutuk 158. Governu halo ona reintegrasaun ba polisia PNTL. Governu emprega hikas polisia hirak-ne'e no fó kompensasaun husi tempu ne'ebé sira iha hela situaun reforma.

11 *Reforma no reestruturá kedas Servisu Nasionál Intelijénsia, hodi garante integridade no profesionalizmu iha instituisaun ida-ne'e.* Servisu Nasionál Intelijénsia hahú ona ninia reestruturasaun. Iha loron 5 fulan-setembru tinan 2023, halo ona Serimónia Transferénsia Poderes Lideransa SNI nian. Lideransa foun ne'e komposta husi Diretór-geral Longinhos Monteiro, no husi Diretór-geral adjuntu, Egas Moniz.

12 *Alerta ba Ajente PNTL sira hotu, ne'ebé jura ona atu serbi partidu determinadu ida, atu dada an hosi lasus juramentu ka, sai husi PNTL.* Promove ona asaun sensibiliza-saun no formasaun ba ajentes PNTL, nune'e mós reuniaun ho dirijente boboot sira PNTL nian, inklui vizita ida husi Primeiru Ministru ba Akademia PNTL, hodi promove valór boot kona-ba integridade, profesionalizmu, izensaun política ka partidária.

13 *Halo eliminasaun imediata ba aumentu brutal husi impostu ne'ebé hetan aprovasaun iha fulan-janeiru tinan 2023.* Governu ne'e ajusta ona taxa impostu seletivu konsumu no direitus aduaneirus importasaun nian ne'ebé aplikavel iha tinan 2023. Elimina ona taxa impostu seletivu konsumu nian kona-ba masin-midar nune'e mós aumentu ba direitus aduaneirus importasaun nian, hodi aplika filafali taxa anteriór husi 2,5%.

14 *Audita no revee, bainhira nesáriu, "negósiu" boot sira ne'ebé halo ona iha mandatu ikus governu anteriór nian.* Governu hari ekipa serbisu oioin atu audita no revee negósiu "boot sira" balun ne'ebé halo ona lori Timor-Leste nia naran husi Governu VIII iha ninia mandatu ikus.

15 *Garante disponibilidade imediata ba ai-moruk sira ne'ebé ospital no sentru saúde sira presiza.* Governu kria Institutu Nasionál Farmásia no Productus Médikus (FPM) hodi sosa, prodús no asegura kontrolu ba qualidade produktu farmaséutiku no ekipamentu médiku sira. Governu prosede mós levantamentu ba nesiedade kona-ba medikamentu no produktu médiku no farmaséutiku sira seluk ne'ebé falta iha ospital, sentru saúde no laboratóriu sira, no selebra kontratu ida hodi fornese ai-moruk sira hotu ne'ebé falta ho urjénsia. Kontratu ne'e ho valór dolar amerikanu millaun 5,9, hein hela aprovasaun husi Kámara Kontas.

16 *Transforma merenda eskolar sai refeisaun ne'ebé "manas" no nutritiva duni ba labarik sira.* Ministériu Edukasaun dezvoltolve ona serbisu koordenasaun nian ida ho ajénsia internasionál sira, hanesan PAM, CARE Internasionál no FAO. ME realiza ona asaun observaun no monitorizasaun nian iha eskola nasional no munisipal sira, hodi rekolle informa-saun sira kona-ba implementasaun Programa Merenda Eskolar nian. Hosi fulan-jullu to'o fulan-setembru, Governu kontinua atividade formasaun no distribuasaun Matadalan Implementasaun nian ba Diretór, Koordenadór no Ekipa Jestaun Programa eskola nian. Iha trimestre ikus ida-ne'e, Ministériu Edukasaun identifika mós eskola sira ne'ebé ninia instalasaun koziña, hariis-fatim no asesu ba bee moos iha kondisaun ne'ebé aat, hodi aselera prosesu distribuasaun material apoiu nian.

17 *Hadi'a kondisaun asisténsia no tratamentu ba deficiente sira iha Sentru Reabilitasaun Nasionál no, iha futuro, harii sentru ne'ebé hanesan iha Munisípiu sira hotu.* Governu estabelese ona Konsellu Nasionál ba Ema ho Defisiénsia, inklui ninia Sekretariadu. Gabinete Inspesaun no Auditoria MSSI nian halo ona auditoria ida ba Sentru Nasionál Reabilitasaun, ne'ebé nia rezultadu halo ezonerasaun ba Diretora no Subdiretór sira iha Sentru Nasionál Reabilitasaun. Kria ona Diresaun foun ida, ho objetivu atu promove reabilitasaun ba ema ho defisiénsia ho efetivu.

18 *Halo levantamentu kona-ba nesiedade prinsipál sira ba manutensaun estrada no normalizasaun mota iha Timor-Leste laran tomak, atu bele hahú obras reabilitasaun nian ho urjénsia iha tinan oin.* Ministériu Obras Públicas, bazeia ba despaxu hosi Primeiru-Ministru, n. 002/PM/VII/2023, halo levantamentu tékniku ba dadus kona-ba kondisaun infraestruturá sira ne'ebé hetan estragu no nesiesita reparasaun urjente. Identifika ona infraestruturas hanesan estrada, muru proteasaun no normalizasaun mota sira, ne'ebé presiza serbisu urjente iha munisípiu 8. Tuir previzaun, serbisu sira sei remata to'o fulan-dezembru tinan 2023.